

# 中國建設新報週刊第一卷第二期目錄

|               |      |
|---------------|------|
| 鹽稅應取就場征收法     | 林醉陶  |
| 革新稅制與提倡國貨     | 醉公   |
| 北平國立九校歸併問題    | 紀倫   |
| 提倡國貨服裝        | 恕    |
| 提倡國貨應同時求原料之獨立 | 天視生  |
| 交通事業今後之我望     | 懺    |
| 我之裁兵問題觀       | 昭    |
| 北平市衛生之應建設者    | 今聞   |
| 全國民衆應咸具有財政常識  | 斧    |
| 對於審查戲曲之我見     | 一得軒主 |
| 餘興            |      |



## 鹽稅應取就場徵收法

(林醉陶)

△師唐劉晏氏一稅之後任其所之法

近來談鹽稅者。各具一說。莫衷一是。鄙見則以就場徵收之法。較爲完善。特分述之。以貢獻於鹽政當局焉。

我國自三代至秦。鹽利皆在於民。至漢武帝時。始領以官。然聽民爲之。官爲督察而已。隋猶無禁也。自唐乾元始變鹽法。論盜煮之罪。乃專於官。迨寶應間。劉晏爲鹽鐵使。置『一稅之後。任其所之』之法。人民稱便。爲後世所昉。及後朝代屢易。鹽法之因革損益者。益復浩繁。迨至遜清。用引票之法。奸商壟斷。私梟遍處。而鹽政益復紊亂。民國建元而後。對於清法。雖略有刪除。然而行鹽之地。各分疆界。且稅率高昂。苛捐繁多。正課而外。地費、規費、以及卡釐。成本極重。一般慙不畏法之頑民。蹈法網而趨利。而私鹽之增長。日甚一日。遂爲國稅之一大漏卮矣。

夫鹽爲人生日用所必需。其銷數當與人口之孳生成比例。乃人口歲增於前。而官鹽反滯消於後。民固不能食淡也。所食之鹽。既不出於官。又不取於私。而又將誰取。其利弊不待明

眼人而後知。故欲整頓鹽法。必先盡除釐捐、規費、等等名目。輕減稅率。則稅項雖若驟減。然辦理得宜。不一二年。而增加數倍。可斷言也。

至於分割疆界。尤足以助私鹽之流行。蓋同在一國之內。同是一國之產。同納一國之稅。然在甲地則爲公。在乙地則爲私。不平孰甚。且各省鹽稅。互有輕重。而官鹽之價。因而互殊。則稅輕者易銷。稅重者多滯。氓氓無知者流。貪利蹈法。越界兜售。而緝私者。復狐假虎威。指鹿爲馬。譎者逍遙法外。愚者墜羅法網。而悍者則拒捕傷人。釀成鉅患。古今來以緝私而致變者。不可勝計。且防之過急。尤足以使愚者爲悍者用。瞻觀歷代史籍。所記載者。如唐之黃巢。蜀之王建。吳越之錢鏐。元之張士誠。方國珍。明之汪直。清之王倫。蔡牽。無一不藉私鹽爲資糧。遂成國家之鉅患。實非計之上也。今欲遏私鹽。而免釀變。則宜師唐劉晏治鹽之法。就場徵收。一稅之後。任其所之。盡除區域之制限。以謀鹽政之統一。則私不緝而自滅矣。

就場徵收之法。必如何而後可。竊會謂用晏之法。當補其不及。就全國產鹽之地。分爲若干區。區各置一機關。直隸於中央。凡製鹽之人。皆須按政府所定請願書格式。呈請該管機關核準。給以憑照。方准開業。否則課以律刑。則全國中有製鹽人若干。所製出之鹽若干。政府

皆能知之。除此之外。無所得鹽。其鹽價則與凡工商所出貨物之買賣同例。官不定價。鹽固工商兼具之事也。給於工者。必使足償其勞而養其生。鬻於商者。必使得和其市而均其利。足償其勞而養其生。則煎曬之人。樂於從事。而鹽之出也多。多則價不期平而自平。且價不死。則可按民生日用所需之物價。爲鹽價之標準。價既無大小。彼煎曬工。何必不歸於鹽商。則鹽無官私矣。得和其市而均其利。則商業同一業。利害可以相通。肥瘠可以相濟矣。誠如是。則凡食鹽者皆有稅。凡賣鹽者皆爲商。胡私之云哉。

要而論之。鹽稅非良策也。苟國家能有他道以得財源。則豁免之。實爲仁政。然今日之中國。則豈足以語此。既不能豁免。則必圖所以整頓之方。使國家獲其利。而民衆亦不致蒙其害。故其本質雖爲惡稅。而其作用則爲良稅。此余所厚望於鹽政當局者也。

## 革新稅制與提倡國貨

(醉公)

國事確定萬端待理。處內外之任者。將以深謀遠慮。括囊至計。與民更始。拯倒懸之急。意至善也。自濟南慘案發生以來。血氣之倫。匪不憤慨。咸知提倡國貨。實爲唯一救亡之良策。蓋外侮之來也。莫不有招侮之道。吾國承遜清積弱之餘。兼以頻年內訌靡已。自殺未遑。割剝

遺黎。苛於秦政。外人乘機得狎而侮之。恃不平等之條約。束縛吾國人。以遂其經濟侵略之野心。稍有血氣者莫不痛恨。際茲不平等條約猶未修改之時。關稅尙不能自主。而各項稅捐。實爲發展國貨之大障礙。遂至國貨價昂。外貨反得以廉價兜售。自殺政策。莫此爲甚。況自馬關訂約以來。外人工廠。林立於吾國中。以稅率徵收之不平等。資本大小之懸殊。而國貨遂無時不處於失敗地位。欲求其能與外貨相抵抗。憂憂乎難矣。爲今之計。欲提倡國貨。非革新稅制不可。何以言之。譬如甲地之貨。成本未滿一角。而運往乙地。既有丙地之通過稅。又有乙地之落地稅。間或受種種卡釐雜稅之束縛。非售至五六角不可。此種稅制。實足爲阻遏國貨之發展。而予外貨以銷售之良機。其計之細。莫過於此。使稅制苟能革新。對於各種國貨。一律予以免徵。或減輕其稅則。使貨價不因釐稅而加增。而交通當局。對於鐵路運輸。亦當酌減其費。則國貨價值。不至昂貴。自可與外貨較一日之短長。否則。雖日高唱提倡。亦無補於事實也。

## 北平國立九校歸併問題

(紀倫)

自大學院發表改組北平國立九校爲中華大學校後。北平國立九校之復校運動。與獨立

運動相繼而起。於是九校歸併問題遂成爲目下教育建設之一大關鍵。近且由宣傳而進於具體化矣。且各派代表赴京請求矣。此問題之結果固難預料。然而余以爲此次爭論實屬皮相之舉。無足重輕。蓋教育之真諦在於精神。而不在于外表。在於課授。而不在于校名。使各校之課程。能就實際上之學術。作精深之研究。學成之後。自可以其所得。出而救國救民。歸併與不歸併。固無重大之關係也。且學術之進步。在於有奮鬪精神。使各校學生。能本教育之原則。精心研究深遠之學理。則雖歸併爲一校。而各科有各科之課程。各科有各科之學理。固無妨於教育之本身也。如北京大學。雖名一校。而文理法三科。各不相謀。於教育實際上。有何妨礙。彼廣州之中山大學。武昌之武漢大學。南京之中央大學。皆由合併多數學校而成。於教育上。亦未見何等障礙。是其明證。是北平國立九校之使命。在於各校有獨立之精神。而不立於各校有獨立之名義。蓋名者實之寶。無足重輕也。吳稚暉先生對九校歸併問題。謂將來的辦法。仍是各校獨立。不過高級的行政。是中華大學。只把九校維繫起來罷了。此言極有見地。

日前九校恢復。自是九校自動反抗軍閥淫威應有的精神。然九校歸併。亦是目下確實之

適應環境。蓋九校在昔日得以並存。實因當時北平爲首都所在。今者中樞南移。北平雖仍爲文化中心。然以一特別市。似不能容如許多之國立大學。歸併爲一。較爲適合。且歸併後。與校務教育上。亦未曾發生絲毫之影響。是種爭論。亦可謂無謂已極。

在鄙見以爲歸併與否。既無足重輕。而爲目下九校之所最重要者。却惟經費問題。似應督促當局。如何增加。及確定九校之經費。然後對於學務之建設。如何增置圖書館。如何聘請名教授。如何改良各學制。乃於事實有濟也。

## 提倡國貨服裝

(恕)

世風澆漓。人慾橫流。國人以國貨不如外貨之華美。遂屏棄國貨而不用。衣也。食也。住也。無一非用外貨。一若不用外貨。不足以示闊綽者。矜奇鬥靡。競爲風尚。無識之徒。則以時髦相誇。無知之氓。則爲價廉所誘。舉國風靡。金錢外溢。言之可痛。若長此以往。國將不國。彼外人之吮髓監腦。日施其經濟侵略之野心。何往而不足以制吾國之死命。彼無識者之以時髦相誇尚。而用外貨。其心固不足誅。而無知之貪價廉。而用外貨。祇知個人之經濟。而不顧國際之經濟。亦未可以原恕也。此時挽救之道。應宜家傳戶喻。所有一切服裝材料。宜一律用



國貨。若中山裝、衣、袴、等等。甯取樸質耐用之國貨。不取華麗壯觀之外貨。而當局各服務人員。以及商學界各人士。尤須以身作則。爲民衆率。上行下效。自可以挽救末俗。以杜外人經濟侵略之鉅患。昔曾滌生有言曰。風俗之厚薄。自乎一二人之心之所向而已。我竊願當局者之三復斯言也。

## 提倡國貨應同時求原料之獨立

(天親生)

凡國民者。宜用國貨。爲國民應盡之天職。亦爲國民應有之常識。在此民智進化之新世紀中。而我國尙有所謂國貨運動者。誠爲怪事。竊我國幾千年以來。四民之中。注重於士。而於農工商三民。無提倡或指導之決心。任其自生自滅。是以全國之民衆。咸爲虛榮所束縛。均注重於仕途。於是平民與政府。益形隔膜。更以不平等之條約。關稅不能自主。遂至農工商三業。不能發展。國家職是之故。日受外國之經濟侵略。國窮民貧。至於此極。有志之士。知非提倡國貨。不足以挽回原狀。而救國家於將亡。因有國貨運動之舉。於是紗布、肥皂、玻璃、及日用等物品。相繼興辦。頗著效果。然以原料不能獨立。而所出品之國貨。如紗廠之用洋棉。布廠之用洋紗。漂染布帛之漂粉、靛青。亦均來自外國。至於化學原料。則幾無一非舶來品。

提倡國貨應同時求原料之獨立

不過加以國內之人工配合製成而已。如此而曰提倡國貨。不若曰提倡國工。實非提倡國貨之根本辦法。蓋提倡國貨之根本辦法。務力求製造國貨之原料。不藉外貨之供給。以成爲一種純粹之國貨。方符提倡國貨之本旨。則國貨前途。庶有望乎。

## 交通事業今後之我望

(懺)

軍事之時期已成過去。而建設之時期。方且開始。建設之事業。固千緒萬端。而交通一項。尤關緊要。蓋交通事業。不僅爲發展實業、聯絡國防之具。抑且爲調劑民生、增進國富之要圖。更爲灌輸文化、發揚民智之利器。是謀國是者之不可須臾緩也。

查我國交通四政。如鐵、如郵、如電、如航。或以債權所係。在外人之掌握。或以條約所縛。任外人之侵略。此不但利權外溢。卽國權之喪失。實爲獨立國之醜斑。而無線電、及航空事業。猶在創始時期。亦微末不足道。其關係於國家之前途。不亦危哉。

今者交通當局。知不整理交通事業之足以亡國也。因於首都舉行交通會議。集全國民衆。對於交通事業之方案。以謀交通事業之新建設。宏猷碩劃。燭照機先。全國民衆。對於以後交通事業之進行。咸引領而望之矣。

然交通事業。必須有充分之財力。與週詳之計劃。始能得健全之發展。惟回顧我國過去之交通歷史。既屬幼稚。而交通之負債。又有六萬四千九百餘萬之鉅。今後之發展。自必愈感艱難。所望於交通當局。本其救國之熱誠。實力爲民衆謀幸福。則交通事業未來之光明。固可預祝也。

## 我之裁兵問題觀

(昭)

### △裁兵非懈弛軍備

#### △裁兵卽所以建設

北伐告成。全國統一。是由於軍政時期。而入於訓政時期。軍事當局鑒於現在兵額之過多。軍費之浩繁。非裁兵無以救國。而全國民衆。亦感受多兵之痛苦。遂有裁兵之運動。於是裁兵裁兵之聲浪。甚囂塵上。惟一般主張裁兵者。但知兵之不可不裁。而對於所以必須裁兵之真意義。似多有尙未了解者。茲略爲述及之。

我國民革命軍。自廣東出發以來。與過去之各大軍閥。血肉相搏。繼續奮鬪。以環境之關係。不能不增加相當之兵額。故現在各軍隊。未經過充分之訓練者甚多。在軍政時期。原屬權

宜之計。現軍事已告一結束。自應嚴加甄別。汰弱留強。積極訓練。俾使悉成勁旅。蓋兵不在多而在精。是裁兵之舉。不但爲軍事善後。亦卽軍事革新也。是裁兵爲積極之政策。並非消極之主張。或謂裁兵恐至于懈弛軍備。未免有杞人之憂矣。

且裁兵之後。軍費減縮以節省之軍費。移作建設之用。而所裁之兵。又可化而爲工。實行導淮、開墾、築路、畜牧、以及振興實業之計劃。以我國土地之廣。土產之富。需用人工之處正多。在於國家社會上之建設。均有利益。裁兵之後。因勢利導。使數十萬之健兒。努力於建設之工作。則國家少一分利之人。而社會上多一生利之人。此裁兵之直接、間接。均有裨益於建設事業者也。

總之。裁兵問題。在目下現況中。爲不可須臾緩之舉。但事前必有具體之計劃。籌備完善。使其受淘汰之後。不至失所。若任其自生自滅。則又非國家愛護國民革命之至意也。

## 北平市衛生之應建設者

(今聞)

北平市年來衛生腐敗極矣。在昔主其事者。多存五日京兆之心。對於全市之衛生。咸抱敷衍之旨。遂至全市之衛生。廢弛不堪。今者軍事告終。庶政更始。何市長對於全市之衛生。極

爲注意。均極力提倡建設。誠全市民衆之福音也。余亦市民之一。爰以市民資格。就全市衛生之應建設者。臚陳於下。以備採擇焉。

(一)應多僱用清道夫。打掃一切馬路通衢。尤須家傳戶喻。各民衆不得隨地倒垃圾穢物。違者帶罰。

(二)再嚴申各街巷隨地便溺之罰則。違者照章罰鍰。小孩則罰其父兄。並宜令清道夫。將各街巷便溺之遺跡。打掃乾淨。

(三)用拖車或汽大車。將垃圾裝入。至所指定之地方安置。

(四)用汽車或人力在各街巷洒水。免得灰塵飛揚。

(五)僱用滅除蚊蠅夫役。巡行各處。看有污穢的地方。應設法打掃。並洒藥水。從根本上着手。去撲滅蚊蠅。尤望市民大家仿辦。方能周到。

(六)監督改良自來水。及自流井水。並取締不潔之私井。尤望市民大家注意。

(七)檢驗宰售牛羊猪等牲口。

(八)照章辦理中西醫士醫院之登記。

(九)應多添設公共廁所。並宜使之清潔。

(十)辦理衛生檢驗。

(十一)種牛痘以防天花。注疫苗以防霍亂。隨時之宜。力謀推廣。

(十二)取締野犬。防止狂犬病。養狗之家。須照章領照。放狗外出。應加嘴罩。

(十三)遊藝場所公園。戲院。以及各種公共場所。尤當令其注意於公共衛生。

(十四)依照定章。取締不合衛生飲食物品。

(十五)發行衛生月刊。衛生週刊。以及其他之刊物。灌輸衛生常識。使全市民衆。咸了解衛生之主旨。而謀其自治之能力。

(十六)其他一切衛生之指導。及取締各事項。

### 全國民衆應咸具有財政常識

(斧)

記有曰。有人此有土。有土此有財。有財此有用。廣土衆民如我國。而猶患貧。非天之貧我。而我之樂與貧相即也。蓋財政者。亦一種之技術也。然百凡之技術。其精進也。咸基於學問。不學操縱。不能安絃。不能操刀。不能割雞。以小喻大。財政亦猶是耳。

且政府一切政治之建設。無大無小。罔不需財。是故無論任何職司。苟於財政學之綱要。一無所知。則終末由以善其事。或不量政府財力所能及。而妄事興作。則中途竭蹶。而不克底於成。或政府刻不容緩之政務。徒以無術以求得相當之財源。廢而不舉。兩者有一於此。國遂緣以病矣。是財政之學。不但理財者所應有。即其他任職之人員。亦必具有斯項學識也。寧獨此也。即全國之普通民衆。亦應具有普通之財政常識。蓋人生日用。四大要素。如衣食住行。何一項而不需財。苟無財政之常識。不能量入爲出。終是饑寒交迫。流離失所。殃及於身。影響於國。國計民生。大有關係也。

以上所言。則財政學爲國民所應具之常識。應提廣被主旨。使全國民衆。咸具有此種理財之常識。上下互相調劑。則以我國之廣土衆民。出產豐富。胡爲乎而至於患貧哉。

## 對於審查戲曲之我見

(一得軒主)

日昨報載何市長對於改良戲曲事發表意見。謂擬組織審查戲曲委員會。其人選當延請專門學者。與戲劇家。担任一切改良辦法。可見何市長對於北平市政。極爲關心。蓋北平戲劇亟應改良。余前曾言之矣。(見本刊第一卷第一期)對於改良戲劇方面。分爲戲情、戲詞、

戲裝三部。略言其大概。實因戲劇爲社會教育最普及者。影響民衆之風俗甚大。在市政新建設中。不可不加以改良。凡戲劇中一切封建制度。君主思想。以及迷信事實。不能不加以刪除。而於迪啟民智。改易風俗之戲劇。又不能不加以指導而提倡之。此種改良之工作。完全視乎主事者之良否。而定其成績之何如。是審查戲劇者。對於藝術方面。應具有相當智識。否則。改而不良。何貴乎改。此何市長所以有人選當延請專門學者。與戲劇家。担任一切改良辦法也。此類人選。選擇頗難。蓋北平市中之所謂戲劇家者。戲劇之知識。研究者固多。然而或文學欠優。或思想腐化。全材極少。惟是十家之中。必有忠信。是在於何市長之能知人善任耳。



餘興

秋江夜泛放歌

(蔡竹銘)

秋江一碧。連秋水。夜月蘸波。波不起。亂山倒影。落江來。萬頃滄茫。圖畫裏。我來雙槳。破蒼煙。收拾江山。入畫船。放出青天。呼下月。笑問今夕。是何年。對酒當歌。醉當舞。舞欲借吳剛。修月斧。填平大海。削平山。人天缺陷。一朝補。狡獪吳剛。太不情。亂拋涼月。落江橫。掬之不起。呼不出。惟見江山。如鏡。月如晶。沁我心。脾洗我眼。遙向天河飛。一錢誤吸。西江水。入懷。酒腸。芒角。全消。盡隨身。一劍擲。向空。光奪斗。星氣貫虹。驚起眠龍。眠不穩。衝波噴激。浪花紅。月亦低。徊向西。走頃刻。浮雲變蒼狗。萬山依舊。放出頭。孤棹橫。風劍在手。掀髯大笑。天爲秋。古月今月。不知愁。相隨。巢父掉頭去。且任茫茫江水。東西流。

寄內

(林醉陶)

團聚纔將月。無端又別離。隴頭傳驛使。隄畔折柳枝。行行重行行。無言意。淒其光陰傷荏苒。又是隔年期。悔我封侯竟。茫茫歎客羈。倚樓懷梓里。梓里不可知。舉頭望明月。明月笑我癡。

我癡愁更甚。黯黯淚痕滋。憶昔分手處。慙慙互囑詞。千里不相忘。兩心如見之。別後祇惘然。愁思益難支。遊魂歸道遠。獨自哀路歧。孤燈相對影。遙致平安辭。努力加餐飯。甘旨奉親慈。勿爲遠人念。勿爲遠人悲。隔歲荷開日。是我歸來時。

雜感

(徐子開)

鄙衍誇傳大九州。行星我尙小斯球。靈魂偷竟無生滅。來世如今又逗留。乾淨土從何處覓。觸蠻爭到幾時休。酒酣撫劍模糊視。空躍寒芒逼斗牛。

悶雨

(丁訥菴)

等物閒多廢。藏身悔未深。瞻天心自了。搔髮病驚侵。茫昧宣城室。疲慵叔夜心。人謀臧亦否。覆載正層陰。

書作枕

(吳耳似)

心事三分托粉侯。毫端萬緒逞風流。而今落魄京津道。權把殘書作枕頭。